

Djuão kute memã pi'ôk kumrêx no'ôk ne ja.

Jejukôt ba djwýnhbê Djuão ne me kute Jeju marmã pi'ôk no'ôk ne. Arým kubêngê:tte ne arkum pi'ôk no'ôk ne kum ar abên kam kum,

—Ikra ar, akmere ar, àpnhîre ar, Metîndjwýnh ne amijo ĩ ne me bawýr ruw. Kubê ne Jeju. Arým gwaj baje Jeju markam Bãmdjwý ma. Metîndjwýnh kumrêx ne kum gwaj bajabê gwaj kam amipãnh bamã abê ne kam bamã kradjwý jabê, baje abeno bakamykam bamã aben jabê ne kam Metîndjwýnh kabên kôt ar amijo baba, bamã abêkam. NhyM Metîndjwýnh arým Jeju kôt gwaj bajaxwe kunĭ maro akno. Kam dja gwaj kum amijarê nhyM arým gwaj bamar krâta. Nãm ã Djuão kute arkum 'ã karõ ane.

*Kabên kute mýjja kunĭmã tĭn jangjênhja'ã ujarênh.*

*Dju k 5.11; Ap 1.18*

<sup>1</sup> Be, amrêbê ne me'õ nhidjibê Kabên, kute mýjja kunĭmã tĭn jangjênhja, mýjja kunĭ kêtri Kabênja. Kabênja ar imã kabên jarê bar kabênkôt kuman inoo omũ. Ne arým prĭne omũnh mex ne ar inhikrao kupê. Tãm ne bar memã 'ã idjujarênh ar iba. <sup>2</sup> Tãmja, kute mýjja kunĭmã tĭn jangjênhja ne pykakam bõx ne amijo amirĭt bar arým omũn kam 'ã ar amã amijarê. Metîndjwýnhkôt me tĭn rã'ã: rã'ã kadjy ne me'õja kute memã tĭn jangjênh. Ja ne bar ar amã arê. Ta ne me Babãm djwýnhmê ro'ã ar ban kam arým pykakam ar imã amijo amirĭt. <sup>3</sup> Bar ije omũnh ne mar kôt ar amã arê. Gwaj ba baje abeno banhõbikwa kadjy ar amã arê. Gwaj baje abeno banhõbikwakam mrãmri ne baje me Babãm djwýnhmê Kra Jeju Kritu aro banhõbikwa. <sup>4</sup> Mýj kadjy ne ba ja'ã ar amã pi'ôk

no'òk ne? Bir, dja gar omũn aman arým mrãmri akĩno akĩnhkumrêx. Ja kadjy ne ba 'ã ar amã pi'òk no'òk ne.

*Me kute katàt amijo ba.*

*Dju r 8.12; Ep 5.8; Tex k 5.5*

<sup>5</sup> Ga, akamàt kô tykkam me kute mỳjja pumũnh kêt ne mrãnh punuja pumũ. Nhyim me memã pry kurwỳ nhyim me arým irākam katàt ba. Me axwedjwỳ ne me mrãnh punu nhyim me arým memã Metĩndjwỳnh kabẽn jarẽ. Nhyim kam me arým amim kuman kabẽnkôt katàt amijo ba kute mrãmri ne me irākam katàt baja pyrāk. Metĩndjwỳnhdjwỳ djãm mrãnh punun axwe? Arkati. Katàt amijo ban axwe kêtumrêx. Tãm ne Metĩndjwỳnh ar imã arẽ bar arým kuman arým ar amã arẽ.

<sup>6</sup> Gwaj badjwỳ godja gwaj memã kum, “Metĩndjwỳnh ne ijo òbikwan ijo ba”, ane. Ne atekam akamàt kô tykkam bamrãnh punumãn prãbê amim Metĩndjwỳnh kabẽn mar kêt ne bamrãnh punun bajaxwe. Djãm kam mrãmri bakabẽnkumrêx? Kati. Nã gwãm amijo bajêx ne katàt bakabẽn kêtumrêx. Metĩndjwỳnh kute gwaj bajo òbikwa kêt ne kute gwaj bajo ba kêt.

<sup>7</sup> Metĩndjwỳnh ne katàt ar amijo ban axwe kêtumrêx. Nãm kute mrãmri ne me irākam katàt ba pyrāk. Dja gwaj kudjwa kabẽn kôt katàt amijo baban bamã bajaxwe prãm kêt ne kam arým mrãmri bajêx kêt. Nhyim kam Metĩndjwỳnh mrãmri gwaj bajo òbikwakumrêx ne kute gwaj bajo bakumrêx. Ne kam arým prĩne gwaj bajo mex. Kra Jeju Kritu kamròkôt gwaj bajo mex.\* Kute mrãmri ne me kute mỳjja punu põnh nhyim arým prĩne mex pyrāk. Dja ã gwaj bajo mexo ane.

*Me kute amijaxwe kôt Metĩndjwỳnhmã amijarẽnh.*

---

\* 1:7 Dja jãm gwaj bajaxwe man jãm bajaxwe pãnh kamrò prõtja man kam prĩne gwaj bajo mex.

<sup>8</sup> Godja gwaj baje amim,

—Djãm ijaxwe? Kati. Ijaxwe kêtkumrêx, anhÿr jabej, ne kam arík amim bajêx ne bakabên katàt kêtkumrêx.

<sup>9</sup> Nâr godja gwaj tu bajaxwe kôt kum amijarê nhym Metîndjwÿnh arÿm gwaj bajaxwe maro aknon gwaj bakam ngryk kêt ne prÿne gwaj bajo mex. Mrãmri ne kabên kajgo kêt ne katàt kute amijo bakumrêx. Kam dja prÿne gwaj bajo mex gwaj arÿm kum bajaxwe kêt. <sup>10</sup> Djãm gwaj ba ne gwaj bajaxwe kêt? Kati. Metîndjwÿnh ne arÿm memã kum, “Me kunĩ kupãnhã axwe”, ane. Kam, godja gwaj baje memã kum, “Kati, ijaxwe'õ kêt”, anhÿr jabej ne arÿm Metîndjwÿnho kute me'õ 'êxnĩ pyræk. Ne arÿm baje amim, “Metîndjwÿnh 'êxnĩ”, anhÿr pyræk. Ne kam baje Metîndjwÿnh kabên mar kêtkumrêx.

## 2

*Me nêje Metîndjwÿnhmã kabên djwÿnh'ã ujarênh.*

*Xim k 2.5; Idja 4.14, 9.11*

<sup>1</sup> Akmere, àpnhÿre ar, mÿkam ne ba ar amã ikabên ja'ã pi'òk no'òk ne? Bir, ar ajaxwe kêt kadjy. Godja gwaj bajõ arÿm bajaxwe jabej. Mÿj dja gwaj amim arên kuma? Bir, dja gwaj amim,

—Kàjkwakam ne me'õ dja. Jeju Kritu ne dja. Axwe kêtkumrêx. Ta dja inêje Metîndjwÿnhmã kabêno dja. Ta dja inêje kum kabên nhym arÿm ijaxwe maro aknon ikam ngryk kêt, ane. Dja gwaj ã bajõ bajaxwe jabej amim ane. <sup>2</sup> Jejubê ne gwaj bakam ngryko apêx djwÿnh. Metîndjwÿnh ne gwaj bajaxwekam ngryk nhym Jeju kute gwaj bajaxweo pãnh kadjy arÿm ty. Ne kam tyk jakam arÿm gwaj bajaxweo pãnh nhym kam arÿm gwaj bakam ngryk kêt. Djãm gwaj bajbit? Kati. Me kunĩ. Apÿnh pykakam me ba djàri me kunĩ jaxwe nhym Jejubê mekam ngryko apêx djwÿnh.

<sup>3</sup> Djām mrāmri ne gwaj baje amim Jeju markumrëx? Mÿj dja gwaj ja mar on? Bir, dja gwaj me kute katàt amijo ba'ã kute memã karökôt kabënja markumrëx ne kôt ar amijo baba. Ne kam arÿm amim,

—Be ga, ije kabën markumrëx ne kôt amijo ibaja pumũ. Mrāmri ije amim Jeju markumrëx, ane. Gwaj kam arÿm ja ma. Gwaj baje amim Jeju markumrëxja ma. <sup>4</sup> Jeju ne me kute katàt amijo ba'ã memã karõn memã arë. Godja gwaj kabën mar kêt ne kôt amijo baba kêt jabej ne memã kum, “Ba ije amim Jeju mar”, anhÿr jabej. Ne kam bajêx ne bakabën katàt kêt.

<sup>5</sup> Nàr, godja gwaj kabën man kôt amijo baba jabej arÿm mrāmri bamã Metĩndjwÿnh jabêkumrëx. Ne bamã abêo amũ amikamênho mõn kam arÿm amim,

—Mrāmri ne Metĩndjwÿnh kute amikôt ijo bakumrëx. Ga, imã abêkumrëxja pumũ, ane. Gwaj kam arÿm ja markumrëx. Metĩndjwÿnh kute amikôt gwaj bajo baja markumrëx. <sup>6</sup> Me kute,

—Ba ne ba ije Jeju 'amÿnh tÿx ne 'ã idjukanga kêt, anhÿrja ren katàt amijo ba kute ta katàt amijo ba pyræk.

*Me kum kamy jabêmã.*

*Dju r 13.34, 15.12; Dju k 3.14*

<sup>7</sup> Akmere, àpnhĩre ar, imã ar ajabê. Ije ar amã katàt aje amijo aba'ã karökam djã ne ba me kabën ny'õ jarë? Kati. Me kabën tũm ne ba arë. Ar aje Jeju kôt amijo abikamênh krax djakam me kute ar amã kabën jarênh ja ne ba ar amã arë. <sup>8</sup> Ne kam ajte pi'òk jakam katàt aje amijo aba'ã ar amã karõ. Kute mrāmri ne ikabën ny pyræk ne ba ar amã arë. Jeju kumrëx kute kabën ja mar tÿx ne kôt ar amijo ba. Gar arÿm kudjwa kôt ar amijo aba. Nhym kam kabën ar amã kute mrāmri ne ny pyræk. Gar kôt ar amijo aba nhym kam me arÿm Jeju mex man ar gadjwÿ ar amex ma. Ne kam ar ajã amim, “Mrāmri ne ar kabênkumrëx”,

ane. Mỳkam? Bir, gar arỳm me kukràdjà punu kanga. Me kukràdjà punu kute akamàt kô tyk pyràk arỳm kanga. Ne kam arỳm Metĩndjwỳnh kukràdjà ny ma. Kukràdjà ny kôt gar katàt ar amijo aba kute mrāmri ne irākam me katàt baja pyràk. Nhyam kam me arỳm ar ama.

<sup>9</sup> Dja me'õ memã kum,

—Ba ne ba Metĩndjwỳnh kaběnkôt katàt ar amijo iba kute mrāmri ne me irākam katàt baja pyràk, ane. Ne atekam kum kamy kurê. Gwaj baje Jeju kaběnkôt o bakamyja kurê. Djãm mrāmri ne katàt kute amijo bakumrêx? Kati. Axwen kute amijo ba punu rã'ã kute mrāmri ne me akamàt kô tykkam ba punu pyràk.

<sup>10</sup> Nhyam be, me'õ kum kamy jabêja ne mrāmri Metĩndjwỳnh kaběnkôt katàt kute amijo bakumrêx. Katàt kute amijo ba kute mrāmri ne me irākam katàt ba nhyam mỳjja'õ kute me par tok kêt pyràk.

<sup>11</sup> Nhyam be, me kum kamy kurêja ne arỳm amim 'êx ne aminoo aknon kute katàt kute amijo baja mar kêtukumrêx. Kute mrāmri ne me'õ akamàt kô tykkam no biknor ne kute amipry mar kêt pyràk. Mỳkam ne kute katàt kute amijo baja mar kêt? Bir ga, me akamàt kô tykkam baja te rĩtmãja pumũ. Nhyam nokam akamàt kô tykbit. Me kum kamy kurêdjwỳ ne me amakke kêt ne kam kute katàt kute amijo baja mar kêt.

<sup>12</sup> Ar aprĩre, akmere, àpnhĩre ar, mỳkam ne ba ã ar amã ikaběnj arěngo ane? Bir, gar ajaxwe nhyam Jeju arỳm ar ajaxwe pãnh ty. Nhyam kam Metĩndjwỳnh arỳm Jeju man arỳm ar ajaxwe maro aknon ar akam ngryk kêt ne. Kam ne ba pi'òkkam ã ar amã arěngo ane.

<sup>13</sup> Ar akra krãptĩ, ar amã ne ba pi'òk no'òkkam ikaběnj arě. Mỳkam? Bir, Kritu ne mỳjja kunĩ kêttri ar ba. Ar aje Kritu markam ne ba ar amã ikaběnj arě.

Ar ajabatàn nh nymã ne ba pi'òk no'òkkam ikabên jarê.  
Mỳkam? Bir, Xatanaj ar ajaxwemã te kute amiwỳr  
ar ajo akêxmã gar arỳm mar kêt ne arỳm o apa.  
Kam ne ba ar amã arê.

Ar aprĩre, ar amã ne ba pi'òk no'òkkam ikabên jarê.  
Mỳkam? Bir, ar aje me Babãm djwỳnh markam ne  
ba ar amã arê.

<sup>14</sup> Ar akra krãptĩ, ba ne ba pi'òk no'òkkam ar amã ikabên  
jarê. Mỳkam? Bir, Kritu mỳjja kunĩ kêttri ar baja ar  
aje markam ne ba ar amã arê.

Ar ajabatàn nh ny, ba ne ba pi'òk no'òkkam ar amã ikabên  
jarê. Mỳkam? Bir, Xatanaj ar ajaxwemã te kute  
amiwỳr ar ajo akêxmã gar arỳm kubê atỳx ne  
Metĩndjwỳnh kabên mar tỳx ne 'amỳnh tỳx. Ne  
kam 'ã adjukanga kêt ne arỳm Xatanajo apa. Kam  
ne ba ar amã ikabên jarê.

*Me kum Metĩndjwỳnh kĩnh kêtja kukràdjà punu'ã  
ujarênh.*

<sup>15</sup> Me kum Metĩndjwỳnh kĩnh kêtja kukràdjà punu, me  
õ mỳjja punudjwỳ, kwãrik wãnh ar amã kĩnh kêt. Me  
kum me kukràdjà punu kĩnhja kum Metĩndjwỳnh jabê  
kêtkumrêx. <sup>16</sup> Mỳkam ne me kum abê kêt? Bir, djãm  
me Babãm djwỳnh kute memã kukràdjà punu jarênh?  
Kati. Me kum Metĩndjwỳnh kĩnh kêtja ne me kute memã  
kukràdjà punu jarênh. Me axwe kadjy ne me kute memã  
arênh ne memã kum,

—Dja ga amidjwỳnhbito kĩnh, anhỹro ba. Me axwe  
kadjy ne me ajte memã kum,

—Dja ga amim mỳjja pumũnh tỳx, anhỹro ba. Me axwe  
kadjy ne me ajte memã kum,

—Dja ga amibên amijo adjãmra, anhỹro ba. Me  
kukràdjà punu ja ne me kum Metĩndjwỳnh kĩnh kêtja  
memã arênh ba.

<sup>17</sup> Dja me kum Metĩndjwỳnh kĩnh kêt kukràdjà punuja ĩ apêx ne me kum mỳjja punu kĩnhdjwỳ ĩ apêx. Nhyim be, me kute Metĩndjwỳnh kabẽn mar ne kôt kute amijo ba rã'ãja ne me Metĩndjwỳnh kôt tĩn ne ar ba rã'ã: rã'ã ne. Kam kwãrik wãnh ar amã me kukràdjà punu kĩnh kêt.

*Kritu kurê djwỳnh'ã ujarẽn.*

<sup>18</sup> Be, arỳm ĩjabatành mexkam ba ar amã ikabẽn jarẽ. Dja gar amim ikabẽnja ma. Arỳm akati bôx 'ỳr. Arỳm mỳjja kunĩ kute pykakôt amingràn nhym me kunĩ kute aminhinomã amimẽn nh 'ỳr. Dja akati bôx nhym Kritu kurê djwỳnh rax arỳm amirĩt gwaj arỳm omũ. Kritu kurê djwỳnh rax ja ne me arỳm ar amã 'ã ajarẽ. Nhyim kute amirĩt kukãm arỳm ajbir jakam kurê djwỳnh kumex ne amirĩt ne. Kumex amirĩt nhym me arỳm gwaj bamã me arẽ gwaj kam kôt amim,

—Mrãmri arỳm gwaj bawỳr õ akati bôx 'ỳr. Ga, kukãm kurê djwỳnh kumex arỳm amirĩtja pumũ, ane. Gwaj kam arỳm ja markumrêx. Ne amiwỳr akatija markumrêx. Ne amiwỳr me kunĩ kute aminhinomã amimẽn nhõ akatija markumrêx.

<sup>19</sup> Amrêbê ne Kritu kurê djwỳnhja gwaj baje amim Jeju marjamẽ ro'ã krĩ. Nhyim be, arỳm ne me Kritu bê amijo akẽx ne ate ar ban gwaj baro'ã krĩ kanga. Gwaj kam arỳm memã bakaton abenmã kum,

—Be, Kritu kurê djwỳnh ne wã, ane. Gwaj baro'ã me krĩkam djãm mrãmri me kute gwaj bakôt amim Jeju markumrêx? Kati. Me ren markumrêx ne ren Jeju bê amijo akẽx kêt ne ren kator kêt. Nhyim be, kati. Me kute Jeju mar kêt'ã kute amijo amirĩt kadjy ne me arỳm kato.

<sup>20</sup> Be, Kritu kurê djwỳnh dja ar amã 'êx ba. Dja me te ar amã 'êx gar me mar prãm kêtumrêx. Mỳkam ne ar aje me mar kêt? Bir, Kritu mextire ne axwe kêtumrêx ne arỳm ar amã Karõ jano nhym arỳm ar ajo ba. Kute ar ajo bakam

ar aje me kabên katàt kunĩ mar ne aje Kritu kurê djwýnhja mar prãm kêt. <sup>21</sup> Djãm ar aje me kabên katàt mar kêt kam ne ba ar amã pi'òk ja no'òk ne? Kati. Ar aje me kabên katàt markam ne ba ar amã no'òk ne. Be, me kute memã 'êx bakam ne me kute me kabên katàtkôt arênh kêt kumrêx. Ja ne gar arým aje mar.

<sup>22</sup> Nhy mỳj me'õ ne 'êxnhĩkumrêx? Bir, me 'êxnhĩ ne me memã kum,

—Djãm Jeju'ã ne Metĩndjwýnh kute me banhõ Běnjadjwýrbê kumkati mēnh got? Djãm Jejubê Kritu got? Kati. Atemã. Nãm me ã memã anhỹro ba. Me ja ne me 'êxnhĩkumrêx. Me kute Bãm japrýn Kra japrý. Me ja ne me kubê Kritu kurê djwýnhkumrêx. <sup>23</sup> Me kute Kra mar kêtja ne me kute Bãm mar kêt kumrêx. Me kute tu amim Kra markumrêxja ne me kute tu amim Bãmdjwý markumrêx.

<sup>24</sup> Me kute amrêbê ar amã kukràdjà jarēnh dja gar 'amýnh tỳx ne tu amim markumrêx ne 'ã adjukanga kêt. Ar aje Jejukôt amijo abikamēnh krax djàkam me kute ar amã kukràdjà jarēnhja dja gar 'ã adjukanga kêt. Godja gar 'ã adjukanga kêt jabej ne kam Kramě Bãmdjwý 'ã adjukanga kêt. <sup>25</sup> Nhy m kam Bãm gwaj bamã,

—Dja gar ikôt atĩn ne ar aba rã'ã: rã'ã ne, ane. Mrãmri ne gwaj bamã ja jarēnhkumrêx. Kabên pydjĩn arě.

<sup>26</sup> Be, Kritu kurê djwýnh kute Metĩndjwýnhbê gwaj bajo akēx prãm. Mekôt bajaxwemã kubê gwaj bajo akēx prãm. Me'ã ne ba ije ar amã pi'òk no'òkja. <sup>27</sup> Dja me te: kute ar ajo akēxmã ar ajo ane. Mỳkam? Bir, Metĩndjwýnh kute ar amã Karõ janor nhy m kute ar ajamýnh tỳx ne ar ajo bakam. Karõ kute ar ajo bakam djãm atemã me'õ kute ar amã, “Ota, me'õ 'êxnhĩ”, anhỹrmã? Kati. Karõja ta dja ar amã me 'êxnhĩ jarě. Ta ne kute ar amã mỳjja kunĩ, me kukràdjà kunĩ jarēnh ne katàt kute ar amã arēnhkumrêx.



'Êxnhĩ kêt-kumrêx. Amrêbê kute ar amã kukràdjà jarênh kôt dja gar mã Kritu 'amýnh týx-kumrêx ne tu amim markumrêx ne 'ã adjukanga kêt. Nhyim kam me te: ar amã 'êx ne kute ar ajo akêxmã.

*Metĩndjwýnh kra ar 'ã ujarênh.*

<sup>28</sup> Be, arým ijabatàn h mexkam ne ba ar amã ikabên jarê. Dja gar amim ikabênja ma. Dja gar amim Kritu 'amýnh týx ne 'ã adjukanga kêt. Gwaj amim 'amýnh týx ne 'ã badjukanga kêt nhyim arým gwaj bamã amijo amirít. Gwaj bamã amijo amirít gwaj kam arým bamã uma kêt ne bapijàm kêt ne dja.

<sup>29</sup> Gar arým aje Jeju katàt kute amijo baja mar. Me katàt kute amijo baja kunĩdjwý Metĩndjwýnh arým meo kra nhyim me umar djà ny. Jadjwý gar arým aje mar.

### 3

<sup>1</sup> Me Babãm djwýnh ta ne arým gwaj bamã, “Ikra ar”, ane. Djãm kam kum gwaj bajabê ngri? Kum gwaj bajabê:kumrêx. Nhyim be, gwaj babê Metĩndjwýnh krakam me kute gwaj bamar kêt. Me kum Metĩndjwýnh kĩnh kêtja kute gwaj bamar kêt. Mýkam? Bir, me kute Jeju mar kêt-kam ne me kute gwaj bamar kêt. <sup>2</sup> Akmere, àpnhĩre ar, jakam gwaj babê Metĩndjwýnh krakumrêx. Ne kam mýj dja gwaj ĩ bakute? Kon. Kraxje kute gwaj bamã o amirít kêt rã'ã gwaj baje mar kêt rã'ã. Nhyim be, Jeju dja ĩ gwaj bamã amijo amirít gwaj arým prĩne mexkôt omũ. Nhyim kam ta amikôt gwaj badjwý gwaj bajo mex gwaj arým baje Jeju pyræk. Ja ne gwaj baje markumrêx ne amim,

—Nà. Dja ijo mex ba arým ije Jeju pyræk, ane. <sup>3</sup> Gwaj bawýr Jeju bôxkam amakbê bamã bamex prã:m. Gwaj bamã bamex kute ta mex pyræk prã:m. Ne kam kam amak djêje amijo mexo tẽ.

<sup>4</sup> Nhyr be, me axwe ne me Metĩndjwỳnh kukràdjà mar kêt ne kam amikrà ar o ba. Metĩndjwỳnh te memã kum, “Kwãrĩk wãnh ajaxwe kêt”, ane nhyr me arỳm kam amikrà ar o ban tu axwe. <sup>5</sup> Mỳj kadjy ne Kritu ruw ne nã kurũm katon ar ba? Bir, kute gwaj bamã bajaxweo apêx kadjy ne katon ar ba. Ja ne gar arỳm aje markumrêx ne amim,

—Kute imã ijaxweo apêx kadjy ne Jeju katon ar ba, ane. Djãm ta axwe'õ? Arkati. <sup>6</sup> Me kute amim Jeju mar tỳxo ban 'ã ukanga kêtja ne me mã kum axwe prãm kêt. Nhyr be, me mã kum axwe prãm kute amim Jeju mar kêt.

<sup>7</sup> Akmere, àpnhĩre ar, me kute me axwe'ã 'êx ne ar amã, “Me axwe kêt”, anhỳrkam kwãrĩk wãnh gê me'õ o ar anoo biknor kêt. Djãm me axwe mex? Kati. Me katàt kute amijo babit ne me mex. Jeju kôt me mex.

<sup>8</sup> Nhyr be, me kute arek axweo ba prãmja ne Xatanaj meo ba. Mỳkam? Bir, Xatanaj adjàkamã axwe krax ne kute arek axweo ba prãm. Kam ne arỳm me kute arek axweo ba prãmja Xatanaj kute meo ba. Metĩndjwỳnh Kra kute Xatanajo àpanh kadjy ne kato. Dja o apa nhyr arỳm meo ba kêt nhyr me arỳm axwe kêt. Ja kadjy ne nã kurũm katon ar ba. <sup>9</sup> Metĩndjwỳnh kute meo krakam ne me arỳm umar djà ny. Kam ne me arek kute axweo ba prãm kêt. Metĩndjwỳnh Karõ\* kute mỳjja 'y pyràk ne memã wadjàn me kadjwỳnhbê nhỹ, me axwebê àptàro nhỹ. Kam ne me te kute arek axweo bamã. Metĩndjwỳnh kute meo krakam ne me te arek axweo bamã.

<sup>10</sup> Mỳj xêbê ne Metĩndjwỳnh kra ar? Bir, Metĩndjwỳnh kra ne me kum axwe prãm kêt ne kum kamy jabê. Kum gwaj baje Jeju kaběnkôt o bakamyja jabê. Kum kamy

\* <sup>3:9</sup> Metĩndjwỳnh Karõ ne kaběno memã amak bô nhyr me umar djà nyn arỳm kum axwe prãm kêt. Dja ga 'ã Ped k 1.23, Xij 1.18, Mat 13.3-23, Dju r 1.13, 3.5 jarèn ama.

jabê gwaj arým kôt memã bakaton me omũ. Me jabê ne Metĩndjwýnh kra ar. Ja ne gwaj omũ. Mýj xêjabê ne Xatanaj kra ar? Bir, Xatanaj kra ne me kum axwe prãm ne kum gwaj bakamy jabê kêt gwaj kam arým kôt memã bakaton me omũ. Me jabê ne Xatanaj kra ar.

*Me kum aben jabê'ã kute memã karõ.*

<sup>11</sup> Ba ar amã arê gar ama. Metĩndjwýnh ne memã kum, —Dja ga me amã aben jabê, ane. Ja ne gar aje amim Jeju marmo kraxkam aje mar ne mar rã'ã. <sup>12</sup> Be, me bakukãmãre Kaĩ ne arým kamy bĩ. Kwãrik wãnh gar Kaĩ kôt ã amijo anhýr kêt. Xatanaj ne Kaĩo ba nhym arým kamy bĩ. Mýkam ne kamy bĩ? Bir, ta àpênh jaxwe prãmkam nhym kamy katàt kute amijo ba prãmkam.

<sup>13</sup> Bir, akmere, àpnhĩre ar, godja me kum Metĩndjwýnh kĩnh kêtja kum ar akurê jabej. Kwãrik wãnh ar amim, —Je tô mýkam ne me ã ijo ane? anhýr kêt.

<sup>14</sup> Amrêbê gwaj bajaxwekam ne gwaj me biknor tokry djakam bamõrmã. Djãm jakam kam gwaj bamõrmã? Kati. Jakam ne gwaj arým Metĩndjwýnhkôt batĩn ne ar baba rã'ã: rã'ã ne. Mýjkôt dja gwaj ja markumrêx, ne amim,

—Mrãmri ne arým Metĩndjwýnhkôt itĩn ne ar iba rã'ã: rã'ã ne, ane. Bir, gwaj arým mrãmri bamã bakamy jabêkumrêxkôt. Dja gwaj bamã bakamy jabêkumrêx ne arým amim,

—Mrãmri dja ba arým Metĩndjwýnhkôt itĩn ne ar iba rã'ã: rã'ã ne. Ga, arým imã ikamy jabêkumrêxja pumũ, ane. Gwaj kam arým ja markumrêx. Ne kam kôt batĩn ne ar baba rã'ã: rã'ãja markumrêx. Nhym be, me kum kamy jabê kêtja ne me me biknor tokry djakam mõrmã rã'ã. <sup>15</sup> Me kum kamy kurê kunĩ ne me kute me par djwýnh pyræk. Ne kam me par djwýnh dja Metĩndjwýnhkôt tĩn ne ar ba kêt. Ja ne gar arým aje mar.

<sup>16</sup> Nhy m be, Jeju mrãmri kum gwaj bajabêkumrêxkam arým gwaj bapãnh ty. Gwaj ren bamã aben jabê kute Jeju kum gwaj bajabê ne gwaj bapãnh tyk pyrãk. Nhy m me ren arým kute gwaj bakamy'õnh bĩnmã. Gwaj ren bamã bakamy jabêkumrêxkam ren arým memã kum,

—Ba dja ga me ibĩ gê ikamy tĩn ne, ane. Gwaj ren bamã abêkumrêxkam gwaj ren ã memã ane. <sup>17</sup> Nhy m be, me'õ nhõ mýjja nhy m kamy nhõ mýjja kêt. Nhy m arým omũ. Omũnhõ nhỹ:n kam arým amim,

—Je, djãm ije amikutã kum inhõ mýjja kwỳ nhõrmã? Kati. Dja ba kum õr kêt, ane. Djãm tãmwã ne Metĩndjwýnh kôt kum kamy jabê got? Kati.

<sup>18</sup> Be, arým ijabatãnh mexkam ne ba ar amã ikabên jarẽ. Dja gar amim ikabên ma. Kwãrik wãnh gwaj bajkwa kajgokambit memã, “Imã me abêkumrêx”, anhỹr kêt. Gwaj bakabên kwỳ kajgokumrêx. Ate dja gwaj bamã aben jabêkumrêx ne abenmã mýjja ngãn abenmã apê. <sup>19</sup> Dja gwaj bamã me abêkumrêx ne kam arým markumrêx. Metĩndjwýnh arým kute gwaj bajo aminhõkumrêx markumrêx. Ne kam arým amim,

—Mrãmri ne Metĩndjwýnh arým ijo aminhõkumrêx, ane. Ne kam ja markumrêx ne ate bakrãn badjumar mex ne ar baba.

<sup>20</sup> Nhy m be, godja gwaj banhõkre kadjwýnhbê amiman amim,

—Djãm mrãmri Metĩndjwýnh kabên kôt imã me abêkumrêx? Kati. Imã me abê rerekre, ane. Gwaj amiman arým badjumar punu. Ne kam ajte amim,

—Metĩndjwýnh ne kute mýjja kunĩ mar ne kute inhõkre kadjwýnhbê ikabên mar mexkumrêx. Ta dja imã tỳx jadjã, ba arým imã me abêkumrêx, ane. Dja gwaj ã Metĩndjwýnh'ã amim anen arým amikam badjumar punu kêt ne.

<sup>21</sup> Nàr atekam baje banhõkre kadjwýnhbê amim bakabên markam amim,

—Kati. Metĩndjwýnh kabênkõt imã me abêkumrëx, anhÿr jabej ne arým bamã Metĩndjwýnh pyma kêt. <sup>22</sup> Ne kam tu kute gwaj bamã mÿjja nhipêxo kum a'uw nhym arým gwaj bamã ipêx. Mÿkam? Bir, gwaj baje kabên mar ne kõt amijo baba nhym gwaj bakam kĩnhkam dja arým gwaj bamã ipêx. <sup>23</sup> Metĩndjwýnh ne gwaj bamã,

—Dja gar tu amim Ikra Jeju Kritu markumrëx ne ar amã aben jabê, ane. Gwaj kabên ja man kõt ar amijo baba. Tãm ne ja.

<sup>24</sup> Dja gwaj Metĩndjwýnh kute abenã gwaj bamã karõja man kam kabên kõt ar amijo baba. Ne kam arým Metĩndjwýnh kõt ar baba. Nhym kam arým gwaj bakadjwýnhbê amijo kajkep. Djãm mrãmri ne Metĩndjwýnh gwaj bakadjwýnhbê mã amijo kajkep-kumrëx? Mÿjkõt ne gwaj ja ma? Bir, Metĩndjwýnh ne gwaj bamã Karõ jano. Karõ ta dja gwaj bamã,

—Arým ne Metĩndjwýnh akadjwýnhbê amë amijo kajkep, ane. Kam dja gwaj ja markumrëx, Metĩndjwýnh gwaj bakadjwýnhbê amijo kajkepja markumrëx.

## 4

*Me kute me mex jabej me kabimã.*

*A Dju 7*

<sup>1</sup> Akmere, àpnhĩre ar, imã ar ajabêkam ne ba ar amã ikabên. Dja gar amim ikabênja ma. Dja me ar awÿr bõx jabej ne ar amã,

—Metĩndjwýnh kukwakam ne ba ar amã 'ã ajarë, anhÿr jabej. Kumrëx dja gar amim me kabin me mrãmri Metĩndjwýnh kabên kõt kabên katàtmã akato. Mÿkam? Bir, me ta kute amijo Metĩndjwýnh kukwakam ujarënh

djwýnh ne amijo 'êx baja ne krãptĩ. Ne kam arým pyka kuníkôt apôx ne ar ba. Kam dja gar amim me kabi.

<sup>2</sup> Mýj dja gwaj amim me kabin memã bajapôx on? Bir, dja gwaj me kabên ma nhym me memã kum,

—Be, mrãmri ne Jeju Kritu kàjkwa kurũm ruw ne nã kurũm katon ar ba, ane. Godja me ã memã anhÿro ba jabej. Me wã dja gwaj me markumrêx. Nãm me amijo 'êx kêt ne mrãmri Metĩndjwýnh kabên kôt kabênkumrêx.

<sup>3</sup> Nhym be, me kute memã anhÿr kêt ne ate memã kum,

—Be, kati. Nhÿnh ne Jeju Kritu kàjkwa kurũm ruw ne nã kurũm katon ar ba? Kati, anhÿro ba. Me kute memã ja jarênho ba ne me amijo 'êx ne Metĩndjwýnh kabên kôt kabên kêt. Kritu kurê djwýnh'õ ne ja. Ja ne me arým ar amã arê. Kritu kurê djwýnh rax bôxmã arê. Bôx kukãm ne kurê djwýnh kwý arým jakam katon mekôt ar ba.

<sup>4</sup> Akmere, àpnhÿre ar, Metĩndjwýnh kôt gar arým akabên aba. Gar arým kam kurê djwýnho apa. Mýjkôt ne gar o apa? Bir, Jeju ar akam ÿrkôt. Jeju ne ar ajo ban tÿxo kute pykakam kurê djwýnh kunĩ jakrenh mexi.\* Gar kam kukwakam arým meo apa. <sup>5</sup> Me kum Metĩndjwýnh kĩnh kêtja kôt ne Kritu kurê djwýnh amijo ba. Ne kam me kabên kôt kabên. Nhym kam me kum Metĩndjwýnh kĩnh kêtja arým kum Kritu kurê djwýnh kĩnh ne me kabên maro ba.

<sup>6</sup> Nhym be, ar ba ne bar ije memã Metĩndjwýnh kabên jarênhkam mrãmri memã kabên jarênhkumrêx. Me kute ar ikabên markumrêxja gwaj arým me'ã abenmã,

—Mrãmri kute Metĩndjwýnh markumrêx. Ga, kute Metĩndjwýnh kabên markumrêxja pumũ. Mrãmri

---

\* 4:4 Djãm pykakambit kurê djwýnh nhym tÿxo kute akrenh Kati, kàjkwakamdjwý. Jeju ne tÿxo kute kurê djwýnh kunĩ jakrenh mexi. Epedju 1.21-22 dja gar arên kôt ama.

kabênkumrêx, ane. Nhym be, me kute ar ikabên mar kêtja gwaj arým me'ã abenmã kum,

—Kati. Kute Metĩndjwýnh mar kêt. Ga, kute Metĩndjwýnh kabên mar kêtja pumũ. 'Êxnĩkumrêx, ane. Gwaj ã amim me kabio anen arým memã bajapôx ne arým me kuma. Me kabênkumrêx jabej nàr me 'êxnĩ jabej arým memã bajapôx ne me kuma.

*Me kum aben jabêmã.*

*Mat 22.39; Dju r 13.34; Gar 5.14; Ped k 1.22*

<sup>7</sup> Akmere, àpnhĩre ar, imã ar ajabêkam ne ba ar amã ikabên. Me kute amim Metĩndjwýnh markôt ne me kum aben jabê. Kam gwaj bamã aben jabê. Mýj xêbê ne Metĩndjwýnh kra ar? Bir me kum me abêbit ne mebê Metĩndjwýnh kra. Metĩndjwýnh kra ne me umar djà ny. Me kum me abêbit ne me kute Metĩndjwýnh mar. <sup>8</sup> Ta kum me abê nhym kam me arým kôt kum aben jabê. Kam, me kum me abê kêt kute Metĩndjwýnh mar kêt.

<sup>9</sup> Metĩndjwýnh kum gwaj bajabê. Mýjkôt ne gwaj baje ja mar. Bir, nãm arým gwaj bawýr Kra djwýnh jano. Kra pydji jano nhym pykakam bôx. Gwaj kôt batĩn ne ar baba rã'ã: rã'ã kadjy. Kam ne gwaj baje Metĩndjwýnh kum gwaj bajabêja markumrêx ne amim,

—Nà. Metĩndjwýnh kum ijabê:kumrêx, ane. <sup>10</sup> Mrãmri kum gwaj bajabêkumrêx. Djãm gwaj ba bamã Metĩndjwýnh jabê? Kati. Ta ne kum gwaj bajabê. Kum gwaj bajabên kam arým Kra jano nhym nã kurým katon ar ba. Gwaj bajaxwe: nhym Metĩndjwýnh gwaj bajaxwekam ngryk. Nhym Kra arým gwaj bajaxweo pãnh ne Metĩndjwýnhmã gwaj bakam ngryko apêx, gwaj bakam Metĩndjwýnh ngryko apêx.

<sup>11</sup> Metĩndjwýnh kute ã kum gwaj bajabêo anhýrkam gwaj ren kudjwa bamã aben jabê. Akmere, àpnhĩre ar, imã

ar ajabêkam ne ba ar amã ikabên. Dja gar amim ikabênja ma. <sup>12</sup> Djãm me'õ ne arým kàjkwakam Metĩndjwýnh pumũ? Kati. Me'õ ne kute omũnh kêtukumrêx. Kwãrik wãnh gwaj omũnh kêt. Godja gwaj bamã aben jabê nhym Metĩndjwýnh arým gwaj bakadjwýnhbê mã amijo kajkep. Gwaj kam bamã Metĩndjwýnh jabê týxo amũ amikamênho mõn bamã abê tý:x ne.

<sup>13</sup> Metĩndjwýnh ne arým gwaj bamã Karõ jano nhym arým ar gwaj bajo ba. Gwaj kam baje Metĩndjwýnh kute ar gwaj bajo ban gwaj bakadjwýnhbê amijo kajkepja markumrêx ne amim,

—Nà. Kute ar ijo ban ikadjwýnhbê amijo kajkepikumrêx, ane. <sup>14</sup> Ar ba ne bar arým Kra pumũnho iba. Mrãmri ne me Babãm djwýnh arým Kra jano nhym bõx. Kute pykakam me axwe kunĩ pytãrmã ne me'ýr bõx. <sup>15</sup> Me kute memã kum,

—Mrãmri Jejubê Metĩndjwýnh Krakumrêx, anhýro baja. Me ja ne me kute amim maro ba. Nhym Metĩndjwýnh mrãmri me kadjwýnhbê mã amijo kajkep ne amikõt ar meo ba.

<sup>16</sup> Metĩndjwýnh kum gwaj bajabê gwaj arým tu amim markumrêx ne amim,

—Mrãmri, kum ijabêikumrêx, ane.

Me kum aben jabê japõx djãbê ne Metĩndjwýnh. Ta ne kum me abê nhym kam me kõt arým kum aben jabê. Metĩndjwýnhkam me kum aben jabê japõx djãkam ne me mã kum aben jabê. Ne kam me mã kum aben jabêja Metĩndjwýnh amikõt ar meo ban me kadjwýnhbê mã amijo kajkep.

<sup>17</sup> Dja Metĩndjwýnh ã gwaj bajo ane gwaj kam kõt bamã abê týxo amũ amikamênho mõ. Gwaj kam arým bamã abê tý:x ne. Nhym kam Metĩndjwýnh nhõ akati arým bõx. Kute memã axwe pãnh jarênh djã nhõ akati bõx. Gwaj



kam bajbit bamã uma kêt ne dja. Mỳkam? Bir, pykakam gwaj ar babari gwaj bamã abêkam. Gwaj bamã abê kute ta kum gwaj bajabê pyræk. Kam dja gwaj bamã uma kêt ne dja. <sup>18</sup> Ga, me prĩne kum me abêkumrêxkam arỳm kum me uma kêt kumrêxja pumũ. Mỳkam? Bir, me kute meo bikênh karõ ne me kum me uma. Me kum me umakam ne me prĩne kum me abê mex kêt rã'ã.

<sup>19</sup> Mỳkam ne gwaj bamã Metĩndjwỳnh jabê? Bir, ta kumrêx ne kum gwaj bajabê gwaj kam arỳm bamã abê. <sup>20</sup> Nhym kam gwaj baje Jeju kabênkõt me'õo bakamyja, gwaj bajõ jãm bamã kurên jãm memã kum, “Imã Metĩndjwỳnh jabêkumrêx”, ane. Kati. Nã gwãm bajêx. Gwaj baje bakamy pumũnhkam ne gwaj bamã kurêkam te bamã Metĩndjwỳnh pumũnh kêtja jabêmã. <sup>21</sup> Metĩndjwỳnh arỳm gwaj bamã 'ã karõn gwaj bamã,

—Djãm ar amã ijabê? Dja gar amã akamydjwỳ jabê, ane. Kam dja gwaj bamã bakamy jabêkumrêx.

## 5

*Me kute tu amim Metĩndjwỳnh* Kra markumrêx'ã ujarênh.

<sup>1</sup> Mỳj xêbê ne Metĩndjwỳnh krakumrêx? Bir, me kwỳ ï pỳnhkõt kute mã amim,

—Mrãmri ne Jejubê Kritu. Mrãmri ne Metĩndjwỳnh Jeju'ã me banhõ Bênjadjwỳrbê kumkati mênhkumrêx, anhỳrja. Me kute mã amim anhỳr ne tu kute amim markumrêx ja ne mebê Metĩndjwỳnh krakumrêx ne umar djã ny. Ne kam mebê Metĩndjwỳnh krakam me kum Metĩndjwỳnh jabê. Djãm Metĩndjwỳnhbit me kum abê? Kati. Amibu'ã mebê Metĩndjwỳnh kradjwỳ ne me arỳm kum me abê.

<sup>2</sup> Djãm mrãmri ne gwaj bamã amibu'ã Metĩndjwỳnh kra ar abêkumrêx? Mỳj kõt dja gwaj arỳm ja markumrêx? Bir,

dja gwaj bamã Metĩndjwỳnh jabên kabên man kôt ar amijo baba. Ne kam kôt arỳm bamã kra ar abêja markumrêx ne arỳm amim,

—Nà. Imã Metĩndjwỳnh kra ar abêkumrêx, ane.

<sup>3</sup> Dja gwaj kute me kute katàt amijo ba'ã memã karökôt kabênja man kôt ar amijo baban kam arỳm bamã Metĩndjwỳnh jabêkumrêx. Djãm gwaj baje kabên mar ne te kôt amijo babamã? Kati. Gwaj kôt amijo babaja babê tỳx kêt. <sup>4</sup> Mỳkam? Bir, me kum Metĩndjwỳnh kĩnh kêtja te gwaj bamã amikukràdjà jarê gwaj bamã me kukràdjà kĩnh kêt. Metĩndjwỳnh ne arỳm gwaj bajo kra gwaj arỳm badjumar djà ny. Kam gwaj bamã me kukràdjà kĩnh kêt ne kôt amijo baba kêt. Ne tu amim Metĩndjwỳnh markumrêx ne arỳm me kukràdjà kôt amijo baba kêt.

<sup>5</sup> Mỳj xêja ne me kute me kukràdjà mar kêt ne kôt amijo ba kêt? Bir, me kute tu amim Jeju markumrêxbit. Me kute mã amim,

—Mrãmri Jejubê Metĩndjwỳnh Krakumrêx, anhỹro ba. Me jabit ne me kute me kukràdjà mar kêt ne kôt amijo ba kêt.

*Metĩndjwỳnh kute memã Krao amirĩt.*

*Dju r 5:31*

<sup>6</sup> Ne kam mỳj ne Metĩndjwỳnh arỳm gwaj bamã Kra jarêho amirĩt on? Bir, Kra Jeju Kritu bôx ne nã kurũm kato. Ne kam arỳm abatành ne. NhyM Metĩndjwỳnh kute arêho amirĩt kadjy Djuão arỳm ngômã adjà. Ngômã adjà nhyM kam tũmràm arỳm kamrô prôt ne arỳm ty. Djãm ngômã adjàrkambit Metĩndjwỳnh gwaj bamã Kra jarêho amirĩt? Kati. Kamrô prôt ne tykkamdjwỳ kute o amirĩt. NhyM kam Metĩndjwỳnh Karôdjwỳ ajte Kra'ã amijarêho amirĩt. Karô mrãmri katàt kute kabên jarênhkumrêx.

<sup>7</sup> Be, Metĩndjwỳnh arỳm Kra jarêho amirĩto amãnhkrut ne ikjêkêt. <sup>8</sup> Karökôt o amirĩt. Ngômã

adjàrkam o amirît. Kamrô prôt nhym tykkam o amirît. Kunîkôt ne Metîndjwÿnh kabên pydji.

<sup>9</sup> Pykakam me kute mrâmri gwaj bamã mÿjja'ã amijarêhno amirîtkaam gwaj abenmã kum, “Mrâmri ne amijarêhno kumrêx”, ane. Nhym be, Metîndjwÿnh kute Kra'ã amijarêhno amirîtjakam kabên katàto kute me kunî jakrenh. Kam me kunî ren abenmã kum,

—Mrâmri Jejubê Metîndjwÿnh Krakumrêx, ane. <sup>10</sup> Me kute tu amim Metîndjwÿnh Kra markumrêx ne me amim,

—Mrâmri ne Jejubê Metîndjwÿnh Krakumrêx, anen amikadjwÿnhbê markumrêx. Nhym be, me kute amim Metîndjwÿnh mar kêt ne me Jejuo me'õ 'êxnhĩ pyràk. Mÿkam? Bir, mrâmri Metîndjwÿnh kute Kra'ã amijarêhno amirîtkaamrêx nhym me kute amim mar kêtkaam ne me o me'õ 'êxnhĩ pyràk. <sup>11</sup> Nhym Metîndjwÿnh arÿm amijarêhno amirît ne memã kum,

—Me kute tu amim ikra markumrêx arÿm ikôt tÿn ne ar ba rã'ã: rã'ã ne, ane. <sup>12</sup> Me kute Krao aminhõja ne kôt tÿn ne ar ba rã'ã: rã'ã nhym me kute Metîndjwÿnh Krao aminhõ kêtja kôt tÿn kêtkaamrêx ne.

<sup>13</sup> Ar aje tu amim Metîndjwÿnh Kra markumrêx ar. Ar amã ne ba ikabên ja'ã pi'òk no'òk ne. Mÿj kadjy? Bir, ar aje pi'òkkaam ikabên jarênh ne mar kadjy. Dja gar aman tu amikukãm kôt atÿn markumrêx. Metîndjwÿnhkôt atÿn ne ar aba rã'ã: rã'ãja markumrêx ne amim,

—Nà. Dja ba kôt itÿn ne ar iba rã'ã: rã'ã ne, ane. Dja gar pi'òkkaam ikabên jarênh aman kam arÿm tu amikukãm ja markumrêx. Metîndjwÿnhkôt atÿn ne ar aba rã'ã: rã'ãja markumrêx.

<sup>14</sup> Dja gwaj ja man arÿm Metîndjwÿnhmã mÿjjao a'uw. Ta kute amim gwaj bajã karõ kôt o a'uw ne kum,

—Aje ijã amim karõ kôt dja ga ã imã mÿjjao ane, ane. Dja gwaj ã kum ane nhym arÿm gwaj bama. Ja ne gwaj baje

markumrêx. <sup>15</sup> Kute gwaj bamarkumrêx dja gwaj kuman arÿm amim,

—Mrãmri dja kôt ã imã mÿjjao ane, ane. Dja gwaj amim anen arÿm kute gwaj bamã mÿjjao anhÿr kadjy baje amimarkumrêx ne amiwÿr baje mÿjjao badjà'wÿrja markumrêx.

*Me axwe'ã ujarênh.*

<sup>16-17</sup> Apÿnh me axwe djàri kunikôt ne me axwe. Ne kam kwÿ pãnh tyk kêt. Nhym be, atemã me axwe'õ pãnh dja arÿm ty. Godja me'õ me kute Jeju kôt abeno kamy 'õ pumÿ, axwe kôt omÿ. Gêdja o Metĩndjwÿnhmã a'uw ne kum,

—Djünwã, amã ikamy kaprĩ. Kwãrik wãnh kum axweo pãnh kêt, ane. Dja ã kamyo Metĩndjwÿnhmã à'wÿro ane. Nhym arÿm kum axweo pãnh kêt nhym tyk kêt ne tĩn ne. Nàr me axwe 'õkôt. Kôt me tykkumrêxja. Djãm o kute Metĩndjwÿnhmã à'wÿrmã? Kati. Dja mrãmri kôt ty.

<sup>18</sup> Metĩndjwÿnh kute memã amak bõnh nhym me umar djà nyja kunĩ kum axwe prãm kêt. Jadjwÿ ne gwaj markumrêx ne amim,

—Nà. Me umar djà ny kunĩ kum axwe prãm kêt, ane. Nãm me amijaxwe kêt kadjy amijãno djan kum axwe prãm kêt. Nhym kam Xatanaj kute amiwÿr meo akêx nhym me ro'ã axwemã.

<sup>19</sup> Metĩndjwÿnh ne arÿm gwaj bajo kra. Nhym be, Xatanaj arÿm amikôt me kum Metĩndjwÿnh kĩnh kêtja kunĩ ar o ba. Ja ne gwaj baje markumrêx ne amim,

—Nà. Metĩndjwÿnh ne arÿm ijo kra. Nhym be, Xatanaj arÿm amikôt me kum Metĩndjwÿnh kĩnh kêtja kunĩ ar o ba, ane.

<sup>20</sup> Metĩndjwÿnh Kra ne arÿm bõx. Katàt kabên ne katàt kute amijo bakumrêx. Ne kam gwaj baje Kra

katàtkumrêxkôt mar kadjy arým gwaj bamã bajamak bô.  
Ja ne gwaj baje markumrêx ne amim,

—Nà. Arým ne Kra bôx ne imã ijamak bô. Ije ta katàtkumrêx mar kadjy arým imã ijamak bô, ane. Nhyim kam Kra Jeju Kritu arým amim gwaj bapytà. Katàtkumrêxja arým amim gwaj bapytà. Mrãmri kubê Metĩndjwỳnhkumrêx. Gwaj kôt batĩn ne ar baba rã'ã: rã'ã ne. Jadjwỳ ne gwaj baje arým tu amim markumrêx.

<sup>21</sup> Akmere, àpnhĩre ar, mỳjjao metĩndjwỳnh karõ nhipêx me kute kum amijarênhja ne kumex. Dja gar amijãno dja. Mỳjjao metĩndjwỳnh karõ nhipêx'ỳr aje amijo akêx kêt kadjy amijãno dja. Tãm ne ja.

Metĩndjwỳnh Kute Memã Kabẽ Ny Jarẽnh  
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

